

Համայնքների ամրացումը խիստ ձեռնառու էր ցարական Ռուսաստանին, որովհետև նրա միջոցով գյուղացիներից հարկերը գանձվում էին համապարտ երաշխավորության սկզբունքով: Ինչպես տեսանք, Զանգեզուրը Ռուսաստանին անցնելուց հետո հարկերի մեջ մեծ պարզորոշություն էր մտել և արդեն գանձում էին միայն օրինական տուրքերը: Իսկ խաների ժամանակ հարկերը զգալի չափով շատ լինելուց բացի, նաև խիստ կամայական բնույթ ունեին թե՛ իրենց քանակով և թե՛ հարկման չափով:

Համայնքի ամրացման պրոցեսը կատարվում էր ավելի արագ, քան թե խոշոր գերդաստանների մանրացումը և իր հերթին նպաստում էր այդ պրոցեսի արագացմանը: Մանր բնտանիքները ստանում էին ձայն գյուղական վարիչ մարմինների ընտրության ժամանակ²⁰ և ավելի հնարավորություն միջամտելու գյուղի ներքին կյանքի ղեկավարության գործերին, քան թե այն ժամանակն էր, երբ նրանք չէին անջատվել խոշոր գերդաստանի կազմից: Համայնքը ձեռք էր բերում ավելի ճկունություն նոր տնտեսական պայմաններում բնակչության տեղաշարժելը դյուրացնելու համար՝ հարմարություններ ընձեռելով նոր անդամների ընդունելության և հեռացող անդամների գյուղական համայնքի հանդեպ ունեցած պարտականություններից ազատագրվելու: Նշելի է, որ համայնքի այս ձևափոխման պրոցեսում իրենց պահպանողական ուժը ցուցաբերեցին հետաքրքրական հնավանդ ղեկավար սկզբունքները: Հետազոտողները²¹ շեշտում են այն, որ այդ պայմաններում գյուղական համայնքի հողօգտագործման իրավունքը ելնում էր հայ և առհասարակ արևելյան ժողովուրդներին առանձնահատուկ այն դրույթից, որ՝

«հողը, ջուրը և վայրի բուսած խոտն աստծո պարգևներ են»

և միատեղ ապրող բոլոր մարդիկ հավասար իրավունք ունեն օգտվելու բնության տված այդ բարիքներից՝ հողից, ջրից, անտառից և խոտից: Ժողովրդական իրավունքի թելադրությամբ Զանգեզուրի հայաբնակ գյուղերն էլ պահպանում էին հողօգտագործման հնավանդ համայնական բնորոշ ձևերից շատերը, որոնք ապացույց են գյուղական հասարակության անդամների միջև եղած սերտ տնտեսական կապակցության: Անցյալ դարի վերջերին իրենց ուժը դեռ չկորցրած այդպիսի ձևերի մասին Ս. Զելինսկին իր հետազոտության մեջ բերում է հետևյալ տեղեկությունները²².

«1. Հասարակության յուրաքանչյուր անդամ իրավունք ուներ հողից օգտվելու, բայց այդ իրավունքը վայելում էին միայն գյուղի իսկական բնակիչները, թեկուզև մտած չլինեին գյուղացիների պաշտոնական կամերալ ցուցակի մեջ»:

Այս սկզբունքի հիման վրա հասարակությունը անթույլատրելի էր համարում հող չտալ գյուղում ապրող և կողմնակի կոչվող այն անհատներին, որոնք այդպիսի ցուցակից դուրս էին մնում, որպիսիք էին ազնվական ծագում կամ ազնվականությունը նոր ձեռք բերած՝ ծառայության կամ ուսման ցենզով

²⁰ Ամեն շէնում կա որոշ տեղ գյուղական հավաքությունների համար. այսպես՝ հնձորեակում Սպիտակ կոմիթե դուրը՝ Սպիտակ գոմի դուրը և այլն, որոնք սովորաբար կոչվում են գուլամէջ:

²¹ Егiazаров С. А., Свод материалов по изучению экон. быта государственных крестьян Закав. края, Тифлис, т. I, 1887, и т. III, 1889, II отд., էջ 17—55:

²² Зелинский С. П., նշված աշխ., էջ 45, 48, 49: